

Polo Taitusomp Kumwimp Pas

Mekia Akwapnámp Kar

Taitus te Grik fi mekamp aropono. Wokwaek mao te Polo tére nám̄p yaewourimpan, Polo man ‘Apár amor ke Krit mekamp siosén taokeyakrá téreae’ ria pwate nánko, am mek térerá yakámpono.

Polo Timotimpor pas kumwimp ke fek táman, má pas kumwia Taitusomp kor sámp-kérépámpon. Am te mao sios taokeyakáp mwanap arop nánaprá párapop, tá ‘Kwaromp kar kareran sámpá yampourou mwanap aropan yoporampo’rá sér, tá ‘Sios koumteouráp arop fárákapan Kristen paokopnap ninikan yénkrá farákápampo’rá sénámpon.

1 ¹Ono Pol, Kwaromp tére konamp arop, Jisas Kraisomp aposelono. Mao onan, náráponoria nánkárápnamp koumteouráp aropan mér nap mek kárákáre sánkea, am fárákapan yaewour napo, kar kare mériaka Kwaro i konámp ninikaok tukup mwanapria sámp-kérép námpon.

²Ono tére namp te, arop fárákáp mér kárákáreria, Kwaro am fárákapan yiki yaká yak nénk naenámp yépékanáponoria yaewourrá tére nampon. Wokwaek kar Kwaro oukoumwan ankank yoro mo fek nomwan yiki yak mwanámp nénk nanamp rimpon. Mao te kwekár mo i konámpon. ³Koroepa oukoumwan kar am séri tarimp ke fek Kwaro náráp kar farákáp mwanap arop kák tenánko, am fek táman maomp kar érik farákár námpon. Nomwan warko érékép konámp arop Kwaro onan ‘Kar farákápae’rá séri tenánko, ono am tére sámpea kar farákáp nampon.

⁴Taitus e, ono Kwaromp kar farákáp nanko, amo wawiaka ankár mántwaok akwap napantá, amo te ankár onokump táráp kare niamponoriaka, ono waráp por má pas kumwi rae. Amo te wae yino ponankor mér nám̄p niamp napon. Ono ninik namp te, Naropwar Kwar ntia nomwan warko éréképnám̄p arop Krais Jisas amwan námokuráp ninik fek yaewouriaka yonkwae porokwe sánk nepo, yonkwae porokwe fek yakaeria nampon.^a

^a 1:4 2 Ko 8:23

⁵Ono amwan Krit mek pwararamp te, amo tére ankwapmwaek oukoumwan yak námpaná, amo fwapokwapria, ono wokwaek amwan sériampnámp taknámp, amo am mekamp ponankor taun mek sios taokeyakáp mwanap arop yororó kák nanapria nampon.

⁶Amo ankár sios taokeyakáp mwanap arop yororó kák naeria te, arake pourouráp aropan kákampo: Koumteouráp arop nke nap fek kwatae ninikinámp yak monámp arop, tá ankárankamp yupuráp arop, tá maomp tárápu Kraiséen méria, tá nkwakwe make sokoro mo, tá éntupwar naropwaromp kar ták-pwar moi konap.^b ⁷Amo te wae méron, sios taokeyak konámp arop te Kwaromp tére taokeyak konámp aropono. Ae konámpara, am arop te yae-párak kare yárah nánko maok, koumteouráp arop mao kwatae ninik námp nke mo mwanapon. Mao te námo arop tokwae namponoria, arop ankwap fárakapan poukwap naeane. Mao te koupour yonkwae pwarámp naeane. Mao te mánmán ént tokwae fária mánmán naeane. Mao te arop kwaporok fupuk naeane. Mao te mani tokwaerantá kikiank naeane.^c ⁸Mao te ankár náráp nap mek koropnap aropan yae-párak taokeyak naenámp. Mao te ankár kwapwe kare ninikan ponankor warákárria maok, ankár am kwapwe kare ninikaok yárah naenámp. Aeria maok, mao ankár náráp ninik Kwarén sánkea, yae-párak kare ninikaok naenámp. Mao te ankár námokuráp yárah fwapi taokeyak naenámp. ⁹Mao te má kar kwapwe kare má man farákáp nap, ankár fwapia kárakáre fek sámpea méria yárah naenámp. Aeria maok, mao kor fwap arop méranáponoria am kare kar karan farákáp naenámp. Aeria maok, arop kar ták-pwarnap fárakapan kárakáre fek sénánko, námokuráp kwatae ninikan pwarápa mwanapon.

Krit mekamp arop ankwapamp mér sámpá yampourounap kar

¹⁰Ae mwanapara, amo sios taokeyakáp mwanap arop yororó kák nap kwamp te, fwapi ninikampo. Am te apae riteanápe, kápae kare arop sios taokeyak konámp aropamp karwaok mo i konap arop yakáp napon. Am fárakap te kar mwar saráp táman sérarrá paokopria, arop fárakapamp ninik mek kwekár i konapon. Tá Juda fákáre wae Kristeni yakáp napao kor kar ták-siria wae konapon. ¹¹Am taknap arop fárakap te nomo tak mo i konámp ninikan ‘Yumo tak kip’rá séria maok, am tak nap fek mani tirá paokopria maok, arop fiou kápae kareramp mér épérépi kák konapon. Taknap arop fárakapan te amo am kar taokorampo. ¹²Wokwaek námoku mér tokwaeráp aropao námokuráp fi mekamp aropan ninikria arakrá sér, “Krit mekamp arop fákáre te kwekár i konapon. Tá yao pwae mekamp fir niamp kwatae kare arop yakáp napon. Tá fár tokwaerá paokoprá kokwae tákár i konapon.” ¹³Má kar te kare karara, amo ankár fwapia mérenkria

^b 1:6 2 Ti 2:24-26 ^c 1:7 1 Ti 3:2-7

kar kárakáre fek sérria, am fárakapamp ninik fwapokwap napo, Kwarén mér kare mwanapono. ¹⁴Am fárakap Juda firamp tékénou kar, tá nkwakwe make lo kákrá, kar kare pwatea paokop i konap aropamp kar woupwi pátea wa mwanape.

¹⁵Arop fárakapamp ninik yiki kukur kwapwe námp te, arakrá ninik i konapon: Kwaro ti-sápnámp ankank ponankorao kor yiki kukur kwapwe námpon. Aeno arop ankwap fárakapamp ninik kwatae akwap námp te, Kraisén mér moria maok, ankwap ankank kánanke yiki kukur mono. Am te apae riteanápe, am fárakapamp ninik ntiaka námokuráp ninik yurukup i konap te ankár kwatae kare yak námpon. ¹⁶Karan saráp sérrá, “Ono te wae Kwarén mér nampon.” Aerá sénapao maok, am fárakapao paokop nap támao Kwarén younkwe sitenap yéknép námpon. Aenapantá, Kwaro am fárakapan warákár mo kar námpon. Am fárakap te kar táksír konap aropara, ankwap kwapwe kare ninik mwanap pourou mo karenono.^d

Mér koumteouráp aropan sénámp kar

2 ¹Aeno amo te ankár koumteouráp aropan ponankor Kwaromp karwaok akwapnámp ninikan tére kprá arakrá sérampo: ²Mér arop te mánmán ént tokwae kar fáriaka mánmán mwanape. Yae-párák kare ninikria námokuráp ninik fwapnae karia taokeyakáp mwanapon. Ankár mérnámp kwapwe kare yakápria, yonkwae touwe konap ninikan sámpea, nkwakwe make ankank korop námpan kuri kárakáre fek yakáp mwanapon.

³Amo ankár mér koumteouan kor sénapo, Kwaro warákárnámp ninik fek paokop mwanapon. Aropan kánánkámp kar sérar mwanape. Mánmán ént fári konámp ninikao tokwae kari yak naeane. Mao te ankár wakmwaek fápárámpnap koumteouan kwapwe kare ninikan yékné mwanap tisa yakáp mwanapon. ⁴Mao farákápria te arakrá sér mwanapon: “Yiráp poumarop, tá yiráp tárápuan kor warákár kar kip. ⁵Tá yumokuráp ninik fwapia taokeyakria maok, yiki kukur kare yakáp kipo. Tá yiráp nap fwapia taokeyakria, yiráp poumarop, tá yiráp tárápuan kor yaewour kipo. Tá yiráp poumaropamp yae ankore mek yakáp napo maok, mér monap arop ponankor amnap ninik táman nkeria, Kwaromp karan kor wouroump mo mwanapon.”^e

Ménki-tárápuao mwanap kar

⁶Ankár taknámp menkou-tárápuan kor takrá séramp: Am fárakap te ninik fwapia taokeyakáp kour mwanapon. ⁷Amoku támao mekia akwap napo, arop fárakapao amonapaokria, nkwakwe make kwapwe kare ninik

^d 1:16 2 Ti 3:5; 1 Jo 1:6; 2:4 ^e 2:4-5 Ef 5:22

fek paokop mwanapon. Arop kar yénkrá farákáp naeria te kwataenámp kar mént farákáp kwapono. Ankár kwapwe kare ninik kour fek sarápria, yae-párák kare kar yénkrá farákápampo.^f ⁸Amo te ankár yae-párák karenámp karan saráp sénapo maok, am mek kwatae ninik yak námp nke mo mwanapon. Tak napo maok, yopornap arop farákapao kor nomwan wouroump mono, amwan yopornap ninikan pwarápae mwanapon.^g

Kwaporok tére konap aropan sénámp kar

⁹Amo te kwaporok tére konap aropan^h arakrá sérampo: Mao náráp poukeyakáp konap aropamp yae ankore mek yakápria, ponankor nkwakwe make ankank am fárákapao warákár mwanap ninik fek tére mwanapon. Poukeyakápnap aropao kar kwatae sénapo kor, nopok kar pwarokwaprá sér mwanape.ⁱ ¹⁰Mao te ankár am fárákapamp ankank kánanke oukun sámp mwanape, mono. Mao ankár maomp karwaokria yae-párák kare tére napo maok, náráp poukeyakáp konap arop fárákapao nkea warákárria nomwan warko éréképnámp Kwaromp kar farákáp námp táman warákár mwanapon.

Nomo ankár yiki kukur yakáprá Kraisomp Yae yépék mwanámp kar

¹¹Nomo te wae méron: Kwaro námokuráp ninik fek nomwan aropompnámp ninik te wae érik korop námpon. Aenámpara, mao te fwap ponankor koumteouráp arop warko érékép naenámp. ¹²Kwaromp am aropomp támao nomwan Kwarén younkwe sítea paokop i konámp ninik, tá apárokamp ponankor kikiank ninik máte pwarará, oukoumwan má ke fek táman ankár nomo fwapia ninik kouriaka Kwaromp ninikaok saráp kwapwe kare paokop mwanámp yénk námpon.^j ¹³Karenono, nomo Kwar Tokwaeran yépékrá yakáp námp, tá arop nomwan warko érékép konámp arop Jisas Krais, mao érik korop námp fek te, Kwaromp mopor ntiaka wae kwapwerént korop naenámp.^k ¹⁴Kraiso námoku wampwe pwarará sumpwi námp te, nomo ponankor lo kar kwe-pwar konámp mekamp warko yamokwapea érékép naeria ninámpon. Mao te nomwan yáraria yiki kukarea páte nánko, námokuráp arop fákáre yakáp námpara, nomo te ankár kárákáre fek kwapwe kare ninik fek paokop mwanámpon.^l

¹⁵Amo te ankár má kar táman koumteouráp arop fárákapan farákáp saráp yakampo. Amo máma karwaok paokopanáponorá farákápria maok, kar ták-sir konap arop fárákapan kárákáre kor kar sánkria, am fárákapamp ninik fwapokwapampo.^m

^f 2:7 1 Pi 5:3 ^g 2:8 1 Pi 2:15 ^h 2:9 ‘Kwaporok tére konap arop’rá sénámp te, “Juda Tére konap Ninik” Buk 2 kware 35,36 fek nkeampo. ⁱ 2:9 1 Pi 2:18 ^j 2:12 Ef 1:4; 1 Jo 2:16
^k 2:13 Fl 3:20 ^l 2:14 Ef 2:10; 1 Pi 2:9 ^m 2:15 1 Ti 4:12

Kristenao mwanap kwapwe kare ninikan sénámp kar

3 ¹Amo ankár koumteouráp aropan sénapo, Gavman fákáreramp yae ankore mek yakápria, maomp karwaok tukupria yae-párák kare tére mwanap nánap mwanapon.ⁿ ²Am fárákap te arop ankwapan wouroumprá séria kar yorowar mwanape, mono. Am fárákap te ankár porokwe fek yakápria, arop ponankoran kwapwe kare ninik fek yaewour mwanapon.^o

³Amo wae méron: Wokwaek te nomo kor Kwaro i konámp ninikan épépérépria, kar ták-sirirá paokopánko, Satano nomwan poupwekáp nángo, nomo Kwaromp mwae-páraok tukup moimpon. Aeria maok, nkwakwe make kikiank ninik ntia pourou fekamp ankankan warákár i konap ninikao nomwan sámp-fákeyakámp. Aeria maok, nomo ankwapan kokwarokrá paokopria maok, ankwapamp ankank kikiankrá paokopimpon. Arop ankwap fárákap nomwan yorowarrá paokop napo, nomo kor nonopok yorowarrá yakáp námpon.^p

⁴Aempan maok, nomwan warko érékép konámp arop Kwaro nomwan nouroup kareria yaewour kwapwenámp ke érik koropria, ⁵nomwan warko érékép námpon. Mao te nomp kwapwe kare ninikan ninikria, nomwan érékép mono. Námokuráp yonkwae touwe fek nomwan warko éréképámpon. Am takimp te nomwan yárárianánko, nomo táráp yink wourékam niamp nángo maok, Yiki Kor Spiritao nomwan wourékam yiki yak sámp námpon.^q ⁶Jisas Kraiss nomwan warko éréképámpon arop téremp fek táman, Kwaro Yiki Kor Spiritamp ourour kárákáre nomp pourouk ponankor kwarákár námpono. ⁷Am takimp te Jisas Kraiso námoku nomwan ninikiaka yaewourrá fwapokwap nángo, Kwaro nomwan ‘Yae-párák kare arop’rá sénámpon. Mao nomwan yiki yak sámp mwanapria nánapi tenámpara, nomo man méria yépekrá yakáp námpon.^r

⁸Mámá kar máte kare karara, am táman kárákáre fek farákáp napo, Kwarén mérnep arop fákáre am fek ninikiaka kárákáre fek kwapwe kare ninik sámpea yakáp napo maok, am kwapwe kare ninik támao ponankor aropan yaewour naenámpon.

⁹Aeno nkwakwe make moumountukri ninik kákákrá kar yorowar, tá tékénouamp e kouroumprá, tá yoporrá, lo karan saráp kákkarrá yorowar fupukumprá paokop nap te, amo ankár am mek nke kwapono, pwarampo. Nomo te wae méron, am te nomwan yaewour nángo, kwapwe kare ninikaok paokop mwanámp pourou mono.

¹⁰Arop siosomp ankárankamp ninik fek yakáp nap tirá pipirikirrá párakop nángo te, amo ankár maomp ninik ankárank por, tá anánk por,

ⁿ 3:1 Ro 13:1-7; 1 Pi 2:13-14 ^o 3:2 2 Ti 2:23-25 ^p 3:3 Ef 5:8-9 ^q 3:4-5 Jo 3:5-7
^r 3:7 Mt 25:34

arake fek fwapokwap napo, waráp kar wa mo nánko te, man younkwe mwaek pwarampo.^s ¹¹Amo te wae mér napon: Am taknám arop te mwae kup kare pwarará, korokore mwaek akwap námpara, námokuráp kwatae ninik támao waeman man kot naenampon.^t

Pwarnám kar kánanke

¹²Nánkár wakmwaek te Artemas ni, Tikikus ni, man sámp-kérép nanko te, amo te koupour ononampok taun Nikopolis mek koropampo. Ono ‘Ouwi tokwae korop nánko, ént tokwae nám fek te Nikopolis mek yak nanamp’rá sériamp támaono.” ¹³Amo te lo mérnám arop Senas ntiaka Aposolén fwapi taokeyakampo. Amo te ankár am arop yawor mwae akwap nenep ankank moantá, yaewourampo.” ¹⁴Tá nomp koumteouráp arop te fwapia méria kárakáre fek téreteria maok, ankank ankwapmwaek tank nánko, monap aropan yaewour mwanapon. Takria maomp Kristen yakáp nap te yaoao ki tanknám niamp mo, kwaporok yakáp mwanape.”

¹⁵Arop ponankor onont yakáp napao, amwan ‘Gude’rá sénap kar sámp-kérép napon. Aeno amo kuri yinomp ‘Gude’rá sénám má yinomp tampokamp Kristen nouroupén sérarampo.

Ono ninik namp te, Kwaro yumwan ponankor námokuráp ninik fek yaewourria yumont yakanoria nampon.

^s 3:10 Mt 18:15-17 ^t 3:11 1 Ti 6:3-5 ^u 3:12 Ef 6:21-22 ^v 3:13 Ap 18:24 ^w 3:14 Ef 4:28